



Акафист

святителю Нектарию, митрополиту Пентапольскому, Эгинскому чудотворцу

Кондак 1

Взбранный Нектарие Пентаполя митрополите и
Эгинский чудотворче, приносим ти прошения о
болящих сродницех наших: изряден бо явился
еси целитель раковыя язвы и прочих
недугов, всей вселенней благодать даруя, сего
ради едиными усты и едином сердцем воспеваем
ти присно:

Радуйся, Нектарие, архиерее Божий.

Икос 1

Ангела хранителя во святем крещении обретьи,
от младых ногтей равноангельскаго жития
возжелал еси, отче наш Нектарие; ныне же со
Ангелы зрением Славы Божия наслаждайся,
моли всех Ангелов Владыку о поющих ти
сицевая:

Ра́дуйся, венча́нных роди́телей пло́де
благослове́нный;

ра́дуйся, от чре́ва ма́тере Бо́гом освяще́нный.

Ра́дуйся, изде́тка навы́кший послуша́нию;

ра́дуйся, от юности изучи́вый Писа́ния.

Ра́дуйся, Бо́жих словес одушевле́нная кни́го;

ра́дуйся, жива́я боголю́бия скрижа́ль.

Ра́дуйся, Бо́гом избра́нный за кро́тость и
смирéние;

ра́дуйся, дом оста́вивый духо́внаго ра́ди уче́ния.

Ра́дуйся, я́ко тебе́ ра́ди бу́ря зельна на мо́ри
утиши́ся;

ра́дуйся, я́ко поя́сом твои́м надло́мленная ма́чта
укрепи́ся.

Ра́дуйся, орля́ юное, иму́ще криле́ у́мныя
моли́твы;

ра́дуйся, елéне, взыска́вый исто́чники пока́яния.

Ра́дуйся, Некта́рие, архиере́е Бо́жий.

Кондак 2

Ви́дящи ты на возду́се моля́щаяся, черни́ца некая
пристрашна бы́сть, боголю́бче; ты же, дар
молитвы сокрыва́я, уста де́вы клятвою
запечатле́л еси, Госпо́ду в сердце
воспев: Аллилу́ия.

Икос 2

Ра́зум Христо́в молитвою стяжа́л еси, святы́й
Нектарие, во еже разумети, что есть воля
Божия, благая, угодная и совершенная; научи и
нас на всяком месте воздевати руки к Богу без
гнева и сомнения, да при́имеши от нас
похвальная:

Ра́дуйся, во юдо́ли плачевне восхождения
положивы́й;

ра́дуйся, плоды́ Духа израсти́вый.

Ра́дуйся, чадо горы Афонския;

ра́дуйся, ключу́ молитвы Иису́совы.

Ра́дуйся, древяго благочестия светило;

ра́дуйся, граде Святыя Троицы.

Ра́дуйся, благодатию осенённый;

ра́дуйся, Херувиме о́гненный.

Радуйся, соль земли обетованная;
радуйся, слезами сеявый, пожавый радостию.
Радуйся, на немже процветет святыня Христа;
радуйся, яко Бог благодествова тя.
Радуйся, Нектарие, архиерее Божий.

Кондак 3

Силою Вышняго облеченный, отче Нектарие,
силу словес Христовых утвердил еси: «Во
Царствии Моем, — Той рече, — ни женятся,
ниже посягают, но яко Ангели на небеси выну
поют: Аллилуия».

Икос 3

Имуще Пречистая Богородица в услужении все
воинство небесное, тебе, угодниче, аки Ангела во
плоти, воспевателя чудес Своих постави; мы же,
Марийин омофор над тобою зряще, со страхом и
любовию припадаем ти:

Радуйся, тайный избранниче Богоматере;
радуйся, велений Ея исполнителю.

Радуйся, духа кротости от Чистыя Голубицы
приемый;

раду́йся, в песнех духовных Приснодеву прославивый.

Раду́йся, учай угождати неба и земли Царице;

раду́йся, молитвами Матере милость у Сына обретый.

Раду́йся, мерило праведности и мудрости палато;

раду́йся, высотó рассуждения и смирения глуби́но.

Раду́йся, Эгíнский крíне, нéктар покаяния точащий;

раду́йся, Эдёмская пчелó, медом богословия нас снабдева́ющая.

Раду́йся, мировáрнице, миро изливающая;

раду́йся, ча́ше духовного омовения.

Ра́дуйся, Некта́рие, архиере́е Бо́жий.

Кондак 4

Ра́ковую язву кровоточащу на груди имея, иерей храма твоего, Нектарие, смяте́ся, егда ты явлься облобызал еси его, аки во плóти сый; он же исцеление получив, тебе невидиму бывшу, со слезами возопи Бо́гови: Аллилу́ия.

Икос 4

Слы́шаша мно́зи о дивнем исцелении, при
жизни тобою содеянном, егда во стране
Канадстей, святей литургии служиме, в душе
явился еси, чудотворче Нектарие, и расслаблена
некоего мужа воздвигл еси, к чаше его
призывая; той же здрав быв, веси Эгинския
достиже, и ты во плоти узрев, велегласно
взываше:

Ра́дуйся, врачу гостеприимный, Греции похвало;
радуйся, Николая Чудотворца славу стяжавый.

Радуйся, кладезю благостыни;
радуйся, милосердый самарянине.

Радуйся, даром чудес обогащенный;
радуйся, посещаяй люди смиренные.

Радуйся, утешаяй нас чудесы неложными;
радуйся, яко невозможная другим тебе
возможна.

Радуйся, яко скорби наша на радость
прелагаеши;
радуйся, ты бо от очей наших слезы отираеши.

Радуйся, одержимых бесы свободителю;
радуйся, раковыя язвы исцелителю.

Ра́дуйся, Некта́рие, архиере́е Бо́жий.

Кондак 5

Боготéчною звездою покаяния возшел еси, отче, над вселенною, лучи сокрушения о людских беззакониях выну испуща́яй; озари умы наша к зрению грех наших, да умило́стивим Владыку пением: Аллилу́ия.

Икос 5

Ви́деша отроковицы чистыя архиерея своего, в лепоте души и тела Богу предстояща, и познавше в нем великаго молитвенника и чудотворца, согласно возгласи́ша ти, святителю Нектарие:

Ра́дуйся, Христа присное жилище;
радуйся, Духа дивное сокровище.

Радуйся, царское священство Великаго Архиерея;
радуйся, призва́нный к Престолу Вечнаго Царя.

Радуйся, Пло́ти Христове сотелéснице;
радуйся, Крове Святыя причастниче.

Радуйся, глашатаю покаяния;
радуйся, ходатаю о нас пред Богом.
Радуйся, Нектарие, Ангелы веселяй;
радуйся, пламеню, демоны пожигаяй.
Радуйся, пучино щедрот;
радуйся, море чудес преславных.
Ра́дуйся, Некта́рие, архиере́е Бо́жий.

Кондак 6

Пропове́дниче Еди́наго Блага́го, Нектарие
блаженный, ты, смирившася под крепкую руку
Божью, Той превознесе; в страстном мори
вла́ющихся не забуди чад твоих, но на бреже
смирения постави я, да возвеличат Бога твоего,
воспевающе: Аллилу́ия.

Икос 6

Воссия́вшу свету блаженств Христовых, от
степене в степень востекл еси, богомудре
Нектарие: кротостию и миром, воздержанием и
любовию душу свою просветил еси, да от нас
ныне слышиши сицевая:

Ра́дуйся, носивый ризу смирения;

раду́йся, оби́ды покрыва́вый прощени́ем.

Раду́йся, наслажда́йся о мно́жестве ми́ра;

раду́йся, насле́дуяй зе́млю кротки́х.

Раду́йся, фи́але пока́яннаго пла́ча;

раду́йся, чистоты́ серде́чныя зе́рцало.

Раду́йся, и́менем Иису́совым насыще́нный;

раду́йся, вода́ми Писа́ний напо́енный.

Раду́йся, ми́лость и суд возвестивы́й;

раду́йся, любви́ю вражду́ упразднивы́й.

Раду́йся, благо́честивы́й житие́м;

раду́йся, гонимы́й правды́ ради.

Раду́йся, Некта́рие, архиере́е Бо́жий.

Кондак 7

Хотя́ человек Бо́жий совер́шен бы́ти, Некта́рие праведне, путь непорочных избра́л еси: на Эгинсте́м о́строве жите́йское море, аки в ковче́зе, препла́вая, победительна́я воспева́л еси Го́сподеви: Аллилу́ия.

Икос 7

Но́ваго Завета учитель изряден явился еси, слово Божие житием своим проповедавый: яко несть наша брань противу плоти и крове, но к миродержителем тьмы века сего. Мы же, о Господе возмогающе, вопием ти, державне Нектарие:

Ра́дуйся, до́блй войне Иисуса Христа;
радуйся, язво духовом злобы поднебесным.

Ра́дуйся, вся оружия Божия восприёмый;
радуйся, препоясавый чресла истиною.

Ра́дуйся, яко но́зе твои красны благовестием
мира;

радуйся, яко на версе́ твоём утвержден шлем
спасения.

Ра́дуйся, щите веры, имже вернии ограждаются;
радуйся, мечу́ обоюдоострый, ереси посеца́яй.

Ра́дуйся, победителю, от древа жизни вкуша́яй;
радуйся, челове́че Божий, странный смерти
вторы́я.

Ра́дуйся, свидетелю веры и́стинныя;

раду́йся, спасения ветвь райская.

Ра́дуйся, Некта́рие, архиере́е Бо́жий.

Кондак 8

Стра́нное обрѣ́тесе в тебе совершенство, точию совершенным в любви доступное; усоверши любовью ду́ши наша, любвеобильне Нектарие, да в мужа совершенна достигше, поем Богови: Аллилу́ия.

Икос 8

Весь был еси в нижних, смиренным последуя, в вышних с Богом, сиречь с Любовию, пребывая; даруй нам, о неботайннице Нектарие, любве́ познание, во еже пети ти сицевая:

Ра́дуйся, яко пленником содеялся еси любве Божия;

раду́йся, яко чад своих любовью пленил еси.

Раду́йся, вы́ю под иго Спасово подклонивый;

раду́йся, бремена ближних носивый.

Раду́йся, в любви укоренѣнный;

раду́йся, в милости утвержденный.

Раду́йся, широту и долготу Креста разумевая;

раду́йся, вы́соту и глубину́ Древа́ постига́й.

Раду́йся, разу́мниче́ любви́, разумъ превосхо́дящая;

раду́йся, полно́ты Бо́жия вмести́лище.

Раду́йся, в уме́ держа́й елика́ истинна́, праведна́ и че́стна;

раду́йся, серде́м любя́й елика́ пречиста́, доброхва́льна и прелюбезна́.

Раду́йся, Некта́рие, архиере́е Бо́жий.

Кондак 9

Вся́кое естество́ анге́льское и челове́ческое уди́вися́ образу́, вели́кий Некта́рие, в тебе́ явле́нному: яко́ несть во́ Христе́ ни иуде́й, ни элли́н, ни ра́б, ни свобо́дь, ни мужеск пол, ни же́нский, но но́ва тварь, Иску́пителю́ твари́ пою́щая: Аллилу́ия.

Икос 9

Вети́я многовещанна́я умо́лкоша́, житию́ тво́ему, святы́й отче́ Некта́рие, дивя́щися́, како́ свят был еси́, грешны́м ся именовавы́й; духо́вен был еси́, из земли́ перстны́я взяты́й; по сме́рти вознесе́н был еси́, при жизни́ умо́м до ада́

низшедый; мы же отверзше уста, аки дети
вопием:

Ра́дуйся, главо, веру возвысившая;

радуйся, уста, безбожие посрамившая.

Радуйся, око, боговедением просвещенное;

радуйся, деснице, могуществом Его
укрепленная.

Радуйся, смиряяй кичливья умы;

радуйся, сокрушаяй гордая сердца́.

Радуйся, явивый силу в немощи;

радуйся, в слезах нашедый радость.

Радуйся, умерый и живый;

радуйся, земный и небесный.

Радуйся, горúшное семя живота;

радуйся, зрелый класе Воскресения.

Ра́дуйся, Некта́рие, архиере́е Бо́жий.

Кондак 10

Спасти́ хотя́ душу свою́, яко́ де́ву, еди́ному
Жениху́ ту обручил еси́; ны́не же вше́д в

невестник Христов с лики девственных,
Нектарие славне, поеши песнь: Аллилу́ия.

Икос 10

Стена́ еси всем прибегающим к тебе,
достохвальне Нектарие, имаши бо благодать
немощны́я врачевати и к небесному наследию
возводити: нас у́бо, чад твоих, уврачу́й и в
Царствие Христово возведи, да вседу́шно рече́м
ти сицевая́:

Ра́дуйся, старче благодатный;

ра́дуйся, ю́ниц путевождь преизрядный.

Ра́дуйся, невинный пастырю невинных овец;

ра́дуйся, мудрый собирателю девственных
жемчужин.

Ра́дуйся, вселенная духовный окормителю;

ра́дуйся, евхаристии пламенный служителю.

Ра́дуйся, гласе смиренного Христа;

ра́дуйся, глаго́ле зижди́тельного Духа.

Ра́дуйся, в терпении искушенный;

ра́дуйся, скорбьми очищенный.

Ра́дуйся, поборниче Божия правды;

раду́йся, насле́днице Христо́вы сла́вы.

Ра́дуйся, Некта́рие, архиере́е Бо́жий.

Кондак 11

Пе́ние Богома́тери приноси́л еси́, уго́днице Бо́жий, Ма́терию Света́ Деву́ имену́я, ны́не же соверше́нне просвети́лся еси́ разу́мением тайны́ воплоще́ния, возно́ся горе́ глас: Аллилу́ия.

Икос 11

Све́том Божественны́я сла́вы просвеща́ема зри́м тя, Некта́рие, в черто́зе сла́вы: просвети́ одея́ние душ на́ших Трои́ческим сия́нием, да воспе́ваем ти неприя́тно:

Ра́дуйся, ка́меню драги́й Царе́вы диа́димы;

раду́йся, молни́е Носима́го на Серафи́мех.

Раду́йся, я́ко светла́ запове́дь, просвети́вшая очи́ тво́я;

раду́йся, я́ко возлю́бил еси́ ю́ па́че злата́ и топа́зия.

Раду́йся, серебро́ разжже́но, очище́но седмери́цею;

раду́йся, гу́сли духо́вныя, Спа́сова цевни́це.

Радуйся, в сердце имя Божие написавый;
радуйся, любовьию подвиг веры оправдавый.

Радуйся, святыню Духа носивый;
радуйся, освятивый души, растлѣнными
страстьми.

Радуйся, праведностию, аки вѣссоном,
убелѣнный;

радуйся, Троицы познанием озарѣнный.

Радуйся, Нектарие, архиерее Божий.

Кондак 12

Благодать, от Бога ти данную, умножая
умножил еси, рабе Божий, благий и верный
Нектарие, темже и нас куплю духовную деяти
сотвори, да обретше лихву, Христу
воспоём: Аллилуия.

Икос 12

Поюще твоя чудеса, пречудне Нектарие, вѣмы,
яко Христос в тя богато вселися, сего ради
чудодейну десницу Его на нас низведи,
глаголющих сице:

Радуйся, преемниче древних отцов;

раду́йся, но́вый уго́дник Хри́стов.

Раду́йся, Ве́ликия́ Це́ркве красото́;

раду́йся, всеми́рная наде́ждо.

Раду́йся, се́бе уничижи́вый, Бо́гом
просла́вленный;

раду́йся, в по́следних хо́дивый, пе́рвым
поставле́нный.

Раду́йся, де́ла́ оби́тели то́чию зна́вый, его́же
знает все́ленная;

раду́йся, чу́ждый до́льняя сла́вы, небе́сною
мздою по́чтенный.

Раду́йся, и́же по ко́нчине недви́жим лежа́й,
неду́жна восста́ви;

раду́йся, и́же мно́гим я́вивыйся, пла́ч о ко́нчине
уста́ви.

Раду́йся, две́ зла́тницы, монаше́ства и
священства́, от Бо́га получи́вый;

раду́йся, с ли́хвою це́льбы́ и чуде́с злато́ Хри́сту
возврати́вый.

Раду́йся, Некта́рие, архиере́е Бо́жий.

Кондак 13

О свяще́нная главо́, дивный врачу́ архиере́е
Бо́жий Некта́рие! Приими́ ныне́ малое, о́баче
теплое моление́ чад твоих, благодати́ сущей в
тебе верующих. Да́руй нам недугов исцеление и
от вечныя изба́ви погибели, да Христу Спа́су
нашему взываем с радостию: Аллилу́ия.

Сей конда́к глаго́лется три́жды.

И па́ки чте́тся 1–й и́кос и 1–й конда́к

Молитва 1

О мирото́чивая главо́, святи́телю Некта́рие,
архиере́е Бо́жий! Во времена великаго
отступления, нечестию мир пленившу,
благочестием просиял еси и главу прегордаго
денни́цы, уязвляющаго нас, сокрушил еси. Сего
ради дарава ти Христос врачевати язвы
неисце́льны, за беззакония наша нас
поразившия. Веруем: возлюби́ тя Бог
праведнаго, да тебе ради нас, грешных,
помилует, от клятвы разрешит, от неду́г избавит,
и по всей вселенней страшно и славно будет имя
Его, Отца и Сына и Святаго Ду́ха, ныне́ и
присно и во веки веков. Ами́нь.

Молитва 2

О святителю Нектаріе, отче богомудрый!
Приими, блюстителю веры православныя,
исповѣдание устен людей христоименитых,
собранных днесь в храме благодатию Божиею, в
тебе живущую. Вестъ бо достиже до предел
Российских, яко ты, велий во святых угодниче
Христов, во всех концѣх вселенныя
призывающим имя твое являешия и от
раковыя болезни исцеление даруеши. Слышахом
об иереи, тебе тезоименитом и храм во имя твое
созидавшем со скорбьми велиими. Раковою убо
язвою грудною пораженъ бе, крови на всяк день
точащейся, и страждаше люте, дѣла же своего
святаго не оставляше. Внезапу ты, святителю
многомилостиве, с небесе сшед, ему во храме
предстал еси в видимом образе. Он же, непщуй
тя собрата, едина от смертных быти, прошаше
молитв твоих и рече: «Боляй есмь вельми, обаче
хощу святой олтарь наздати, да поне единожды
святую литургию вкупе с прихожаны совершу;
послежде и умрети готов есмь, смерть бо мя не
страшит». Ты же, отче, безплотен сый, слезами
лице свое орошаше, и объем страдальца,
лобызаше ѿ, глаголя: «Не тужи, чадо мое, яко,
болезнию испытан, здрав будеши. Все убо о
чудеси сем ведати имут». Он же, исцелен быв,
абие разуме, с ким беседоваше, тебе невидиму

бывшу. О, великий угодниче Христов Нектарие! Храм оный свершен есть ныне, и чудеса твоя, аки море преизливающееся, умножишася! Мы же познахом, яко молитве праведника должно поспешествуемой быти усердием нашим к службе Божией и решимостию за Христа умирати, да здрави обрящемся. Молят тя, отче праведный, болящая чада твоя: да совершается с нами воля Божия, благая, угодная и совершенная, не хотящи смерти грешнику, но еже обратитися и живу быти ему. Ты же, провозвестниче воли Божия, исцели ны благодатным явлением своим, да велик будет Бог на небеси и на земли во веки веков! Аминь.

